

Listovi građaničkog kalendara od 25.11.2007. - 30.04.2008.

OMER HAMZIĆ

.....

29. 11. 2007.

33. sjednica Općinskog vijeća Gračanica: na pomolu rješenje već zaboravljene (promašene?) investicije Privredno-kulturno-sportskog centra (PKSC) u Gračanici i fiskulturne sale za građaničke srednjoškolce, podrška vijećnika Poslovnoj zoni „Širbegović“

Pitanje izvođenja nastave fizičkog odgoja (sportske sale) za srednjoškolce u Gračanici, ostalo je, neriješeno, takoreći, od osnivanja tih škola. Nakon zastoja i obustave dalje gradnje Privredno-kulturno-sportskog centa (PKSC) na Bazenu, čija je fiskulturna dvorana bila namijenjena i za izvođenje nastave fizičkog odgoja građaničkih srednjih škola, to se pitanje još više zakomplikovalo a njegovo konačno rješenje prolongiralo u nedogled.

U informaciji koja je ponuđena na usvajanju Općinskom vijeću, za rješenje ovog problema predložene su tri mogućnosti: prva je da se završi započeti objekat (u koji je već uloženo 1.869.970,25 KM) „uz preprojektovanje krovne konstrukcije i davanje sportske sale na korištenje srednjim školama za održavanje nastave tjelesnog odgoja, o čemu bi se sačinio poseban ugovor o obavezama korištenja i održavanja“. Drugo rješenje je da se izvrši preprojektovanje postojećeg objekta u dva dijela bez rušenja već izgrađenog. Prvi dio bi bio sportska sala za učenike, sa košarkaškim igralištem i pratećim prostorijama, a drugi dio bio bi predviđen za poslovni centar sa odgovarajućim etažama, koji bi se po potrebi

mogao povezati sa sportskom salom radi održavanja sajmovi. U ovom rješenju bilo bi moguće formirati posebnu katastarsku parcelu za školsku sportsku salu i dati je školama ili nakon završetka cijelog objekta i tehničkog prijema upisati škole kao etažne vlasnike tog objekta. Kao treća mogućnost, predloženo je preuređenje objekta u dvije sportske sale sa košarkaškim igralištem i pratećim prostorijama. Tako bi svaka škola imala svoju sportsku salu, dok bi ostali poslovni prostori ostali u vlasništvu Općine.

Nakon sveobuhvatne rasprave, usvojena je „treća solucija“ koja podrazumijeva „preuređenje objekta u dvije školske sportske sale sa košarkaškim igralištem i pratećim prostorijama, ukupne bruto površine od 1200 m² (što ukupno iznosi 2400 m²), tako da bi svaka škola imala svoju sportsku salu, a ostali poslovni prostori ostali bi u vlasništvu Općine.“

Što se tiče Poslovne zone „Širbegović“, vijećnici su informisani da se radi o jednom od najznačajnijih projekata u poslijeratnom privrednom razvoju Gračanice u koji će biti uloženo oko 70 miliona KM. «Poslovna zona» se gradi uz magistralni put Doboj – Tuzla i lokalni put Gračanica – željeznička stanica – Sočkovac na ukupnoj površini od 60.044 kvadratnih. U realizaciju projekta ulazi se s ciljem da se izgradi skup moderne poslovne infrastrukture, koja će se po sistemu „ključ u ruke“ učiniti dostupnom zainteresovanim poslovnim subjektima i potencijalnim ulagačima. Budući poslovni prostori namijenjeni su za

proizvodnju i industriju, skladištenje i distribuciju, trgovinu, istraživanja, razvoj i edukaciju, izložbene manifestacije, obradu podataka i informatičku podršku, biznis centar, hotel, obdanište, rekreacioni centar itd. To je koncept koji se zasniva na iskustvima razvijenih zemalja, koji će omogućiti stvaranje uslova za dugoročan ekonomski razvoj sjeveroistočnog regiona u BiH: povećanje proizvodnje, podsticaja zapošljavanju itd. Prezentirajući vijećnicima ovaj koncept, vlasnik «Širbegović» grupe

gosp. Faruk Širbegović, između ostalog je naglasio: „Ukoliko želimo podstaknuti strane investitore da ulažu u našu zemlju trebamo im ponuditi ovakve poslovne zone.“

Pošto su se predsjednici i predstavnici svih vijećničkih klubova, biranim riječima i pohvalno izjasnili o ovom velikom privrednom poduhvatu, dajući mu punu podršku, Općinsko vijeće je jednoglasno usvojilo sljedeće zaključke: (1) „Da se u okviru općinskog budžeta, a u skladu sa mogućnostima i zakonskim propisima planiraju sredstva za izgradnju infrastrukture u Poslovnoj zoni Gračanica; (2) da Općinski načelnik u svoj program rada u narednom periodu uvrsti aktivnosti na obezbjeđenju podrške u izgradnji infrastrukture od strane Kantonalne, Federalne vlade i nadležnih javnih preduzeća; (3) Općinsko vijeće preporučuje Vladi F BiH i Vladi TK da svojim aktivnostima i sredstvima doprinesu realizaciji ovog projekta.“

5. 12. 2007.

Toplifikacija Gračanice – toplovod „ide“ prema gradu po planiranoj dinamici

Izvođač radova “izlazi” iz ulice Sprečko polje na glavnu saobraćajnicu Doboј–Tuzla, pored koje će toplovod ići sve do “Olimpa”, gdje (ispod mosta) “skreće” starom prugom prema gradu, odnosno Sportskoј sali i Drugoj osnovnoj školi, i dalje prema Domu zdravlja. Drugi krak toplovoda usmjerava se prema industrijskoј zoni. I investitor i izvođač, zajedno sa nadležnim službama op-



ćine ulažu napore da se održi planirana dinamika iako ima raznih poteškoća na trasi, koje su se mogle i očekivati. S obzirom da nema katastra podzemnih instalacija, najviše poteškoća izvođač ima upravo oko tih instalacija, a posebno onih koje su “na divlje” postavljane i za koje često ne znaju ni oni koji se njima služe.

Općinski načelnik je obećao investitoru da će se problemi na trasi rješavati u hodu i da do zastoja radova ne smije doći zbog neriješenih imovinsko-pravnih odnosa i drugih problema na trasi.

„Rješavanje trase“ za 2008. godinu uradit će se zajednički, investitor i Općina, po posebnom termin-planu u kojem će biti definisane dalje aktivnosti, njihovi nosioci i rokovi.

9. 12. 2007.

Umro Mitar Kuzmanović – tihi čovjek iz susjedstva, nekadašnji predsjednik općine Gračanica

Rođen je 1927. godine u Boljaniću, pod Ozrenom, gdje je završio osnovnu školu, a zatim kao i mnogi iz njegove generacije, vanredno je pohađao i završio srednju i višu ekonomsku školu, dugo godina radio u organima uprave sreza i općine Gračanica, od malih nogu pripadao omladinskom pokretu, bio je istaknuti aktivista nekadašnjih društveno-političkih organizacija, saveza komunista, Socijalističkog saveza, učesnik je saveznih omladinskih radnih akcija itd.

Pripadao je generaciji onih rukovodilaca gračaničkog sreza i gračaničke općine, u čijem je sa-

stavu nekada bio i dobar dio Ozrena, koji su svojim radom, svojim angažmanom, bez obzira kako danas gleda na to vrijeme, obilježili razvoj čitavog ovog kraja—sa obje strane Spreče—na putu ka boljem i sretnijem životu. To su nekadašnji predsjednici Općine Gračanica: Asim Dževdetbegović, Mirko Garić, Rizah Suman, Čamil Naimkadić, Borislav Žuža, Faruk Mujić itd.

Na dužnosti predsjednika Općine Gračanica Mitar Kuzmanović je bio od 1968. do 1974. godine. Bio je to period modernizacije industrijskih pogona s obje strane Spreče, kada su pravljene novi mostovi na Spreči, kada su polagani prvi kilometri asfalta po selima gračaničke općine, prvi vodovodi i telefoni...

Kao predsjednik Općine, ostao je u vrlo lijepom sjećanju u narodu nekadašnje Općine Gračanica, svih nacionalnosti, kao čovjek koji je u svakom trenutku bio spreman da pomogne, da posavjetuje... da pruži ruku. Te su ga osobine krasile uvijek—dok je radio u Poreskoj upravi Općine, kasnije nakon isteka mandata, kao direktor „Ozrenke“, kao vrsni aktivista u Organizaciji penzionera i drugih lokalnih udruženja, učesnik mnogih društvenih akcija itd. Zajedno sa ostalim bivšim predsjednicima gračaničke općine dugo godina je bio u neformalnom savjetodavnom timu aktuelne lokalne uprave. I u najteže ratno vrijeme sačuvao je svoju smirenost, ljudsko dostojanstvo i hladnokrvnost, mudro i razumno je, zajedno sa svojom suprugom Bojom, dijelio sudbinu svog bošnjačkog komšiluka u Gračanici i odolijevao teškim iskušenjima i izazovima rata. Ostao je do kraja dosljedan svojim uvjerenjima, svojoj principijelnosti, konačno svojim idejama.

Sahranjen je 12. 12. 2007. godine u Boljaniću. U ime Gračanice, od njega se oprostio aktuelni načelnik općine Nusret Helić.

12. 12. 2007.

Smajo ef. Mustafić, glavni imam Medžlisa Islamske zajednice Gračanica

Nakon odlaska Fikret ef. Pašanovića na službu u Sarajevo, posljednjih dvanaestak mjeseci, dužnost glavnog imama Medžlisa Islamske zajednice i džematskog imama Bijele džamije Gračanice obavljao je Abdulah ef. Hodžić. U međuvremenu izvršena je reorganizacija unutar Medžlisa, pa je funkciju glavnog imama, nakon provedene odgo-

varajuće procedure, preuzeo Smajo ef. Mustafić, koji će i dalje raditi kao džematski imam u mahali Drafnići, dok će Abdulah ef. Hodžić ostati na službi imama Bijele džamije u Gračanici. Smajo ef. Mustafić je rođen 1979. godine u Babićima, završio je Gazi Husrev-begovu medresu, diplomirao na Fakultetu islamskih nauka (2002.), službovao u Babićima, Miričini i posljednjih 17 godina u džematu Drafnići.

14. 12. 2007.

„Gračanički glasnik“: predstavljena „dvadesetčetvorka“ u Gračanici i Tuzli

Uz predstavljanje glavnih sadržaja broja, posebno se govorilo o prvoj organizaciji KPJ u Gračanici i njenom antifašističkom djelovanju u toku Drugog svjetskog rata—od osnivanja, u proljeće 1941. do raspuštanja, u jesen 1944. godine. Uvodničar je bio mr. sc. Omer Hamzić, čiji je rad pod tim naslovom objavljen u ovom broju Časopisa.



Na promociji Časopisa u Tuzli, koja je obavljena 18. 12. 2007. godine u sali BKC, predstavljene su sadržaji sa Okruglog stola „O književnom stvaralaštvu Zlatka Dukića“, koji je u organizaciji ovog časopisa održan 14. 11. 2007. godine u Gračanici.

15. 12. 2007.

Formiran Aktiv islamskih vjeroučitelja općine Gračanica i Doboj-Istok

Članovi Aktiva su svi vjeroučitelji koji su u radnom odnosu u nekoj od osnovnih škola na području općina Gračanica i Doboj Istok. Aktiv nema svojstvo pravnog lica, djeluje u jedinstvenoj strukturi Islamske zajednice u Bosni i Hercegovini, a sastavni je dio Savjeta vjeroučitelja na regionalnom nivou sa sjedištem u Tuzli. Ak-

tiv broji ukupno dvadeset i dva (22) vjeroučitelja koji predaju u 13 centralnih i 12 područnih osnovnih škola na području općina Gračanica i Doboj Istok. Od 22 vjeroučitelja, 7 je profesora, 12 nastavnika, dok su trojica vjeroučitelja studenti sa prethodno završenom medresom.

Neki od ciljevi Aktiva su: poboljšanje kvaliteta nastave Islamske vjeronauke; unapređenje islamskog odgoja i obrazovanja; afirmacija moralnih, naučnih, kulturnih i intelektualnih vrijednosti Islama i bosansko-hercegovačkog društva; zalaganje za jednak radni status nastavnika vjeronauke sa drugim nastavnicima; uspostava saradnje na vjerskom, strukovnom, naučno-stručnom, kulturno-zabavnom i sportskom nivou sa drugim aktivima na području Kantona i šire; očuvanje i njegovanje tradicijskih i kulturnih vrijednosti muslimana na ovim prostorima; saradnja sa drugim institucijama i asocijacijama...

Za predsjednika Aktiva izabran je Samir Dečić, a za generalnog sekretara Nermin Džebić.

17. 12. 2007.

Umro Jakub Muftić, jedan od prvih gračaničkih privatnih poduzetnika modernog doba

Nakon kratkotrajne bolesti, prestalo je da kuca srce ovog vječitog optimiste, s vedrinom u očima i neizbježnim osmijehom na licu... i kad mu je bilo najteže. Čitav svoj radni i životni vijek proveo je u rodnoj Gračanici, gdje se školovao, doškolvavao, bio aktivista, lokalni funkcioner, jedno kratko vrijeme i potpredsjednik općine... Nije se proslavio u politici, jedno vrijeme čak je bio pod „paskom“ svemoćne UDBE (ko zna zašto), pa je svoje mjesto tražio u privredi, u konkretnom radu. Bio je direktor i osnivač više gračaničkih preduzeća: komunalnog, „Gradesa“... Sedamdesetih godina prošlog vijeka osnovao je Zanatsku zadrugu privatnih poduzetnika u Gračanici, prvu tog tipa u Bosni i Hercegovini, u kojoj se proslavio i istovremeno doživio najteže trenutke u svom životu. Bio je krivo optužen i kratkotrajno pritvoren za nešto što nikada nije dokazano, ali nikada nije dobio satisfakciju režima za nepravdu koja mu je nanesena. Nakon toga nastao je da se bavi „privatlukom“ (najviše u sferi pretrade plastike) iako se na to još uvijek gledalo kao na neki „tolerisani lopovluk“.

U takozvanom „privatnom sektoru“ ostao je

aktivan, takoreći do zadnjeg dana, neumorno tražio za novim programima i novim iskoracima, posrtao i dizao se. U zadnjim godinama, u novim uslovima i sa novim „privrednicima“ mnoge svoje ideje, nažalost, nije mogao realizovati, uzalud je tragao za partnerima i parama i uvijek se nadao da dolaze bolji dani. Nažalost, nije ih dočekao. Umro je u 74. godini života i ukopan u Gračanici.

19. 12. 2007.

Tematska sjednica Općinskog vijeća: donesena Odluka o davanju saglasnosti za prenošenje prava korištenja dijela objekta Privredno-kulturno-sportskog centra PKSC-a (u izgradnji) na Mješovitu srednju školu Gračanica i Gimnaziju »Dr. Mustafa Kamarić« Gračanica

Riječ je o prenošenju jedne polovine sportske sale, površine 953,25 m² sa izgrađenim tribinama, prostoriji za opremu, površine od 102,30 m², hodniku površine od 9,24 m², te prostoriji predviđenoj za agregatnu stanicu i podstanicu, površine od 20,16 m²—u suterenu započetog objekta. Po okončanju izgradnje i stavljanja u funkciju sportskih dvorana za potrebe Mješovite srednje škole i Gimnazije, sadašnji objekat »Dom partizana« prenijet će se na Općinu Gračanica, o čemu će se sastaviti poseban Ugovor o prenosu. U tom smislu, obaveza je Općine Gračanica da izvrši preprojektovanje objekta PKSC-a, te da nakon izvršenog preprojektovanja dostavi projektnu dokumentaciju Mješovitoj srednjoj školi, Gimnaziji »Dr. Mustafa Kamarić« Gračanica i Ministarstvu obrazovanja, nauke, kulture i sporta Tuzlanskog kantona. Posebnim ugovorom regulisat će se nesmetano korištenje sale za sportske,



Objekat PKSC-a u izgradnji

kulturne i društvene potrebe grada Gračanice u terminima u kojim se ne ometa odvijanje procesa nastave, uz nadoknadu realnih troškova.

Pripremni radovi i pokrivanje započetog objekta će se realizovati po procedurama Zakona o javnim nabavkama preko Općine Gračanica iz sredstava koja su obezbijedena Općini Gračanica iz Budžeta Tuzlanskog kantona za 2007. godinu u iznosu od 400.000 KM i sredstava Općine Gračanica koja su planirana za ovu namjenu u Budžetu Općine Gračanica za 2008. godinu, srazmjerno vlasništvu Mješovite srednje škole Gračanica, Gimnazije »Dr. Mustafa Kamarić« Gračanica i Općine Gračanica nad korisnom površinom objekta PKSC Gračanica. Nakon izgradnje objekta PKSC i pribavljanja upotrebne dozvole, upisat će se pravo suvlasništva na objektu i zemljištu ispod objekta ma ime Mješovite srednje škole Gračanica i Gimnazije »Dr. Mustafa Kamarić« Gračanica.

Ovom odlukom obezbijedene su pravne postavke za konačno rješavanje pitanja PKSC koje se čeka skoro 10 godina, ali i pitanje izvođenja nastave fizičkog odgoja gračaničkih srednjih škola koje se čeka faktički od njihovog osnivanja.

Na potezu je, opet, općina.

26. 12. 2007.

Izbor sportiste Gračanice za 2007. – najbolji Selimović i Topčagić

Ova godina ostat će upamćena po velikom uspjehu NK „Bratstvo“, koji se nakon višegodišnjih pokušaja uspio plasirati u I. nogometnu ligu. Najbolji sportista je Mirzet Topčagić (NK Bratstvo i MNK Kaskada), najbolja sportistkinja: Edina Selimović (ŽOK Gračanica) najbolji muški klub: NK Bratstvo Gračanica, najbolji ženski klub: ŽOK Gračanica, najbolji trener: Huso Bešić (MNK Kaskada), najbolji sportski radnik: Mujo Hasić (NK Mladost Malešići), priznanja za poseban doprinos razvoju sporta: Nusret Helić, Škola nogometa "Eurogol", DOO "Sisko trade", DOO "Radius", DOO "Mirna", DOO "Plamingo", DOO "Limorad"; najbolji junior: Dino Hadžić (NK Bratstvo), najbolja juniorka: Selma Kovačević (Karate klub «Lavovi» Miričina), najbolji kadet: Adnan Brđanović (RK Gračanica), najbolja kadetkinja: Almedina Ahmelić, (Karate klub Gračanica), najbolji pionir: Sead Zahiro-

vić (Biciklistički klub Gračanica), najbolja pionirka: Sanja Hasanbašić (ŽOK Gračanica), najbolji sportski novinar: Fikret Konjić, najbolji sportista invalid: Halim Grbešić (IKK Veterani Tuzla), najbolji sportista rekreativac: Salim Brkić (Izvor: Sport IN)

31. 1. 2008.

35. sjednica Općinskog vijeća: Nije usvojen novi statut Općine Gračanica, zapelo oko ograničenja broja mandata općinskog načelnika

Nakon višemjesečne rasprave o ovom dokumentu, ponuđeni prijedlog komisije, koja je radila na Statutu, nije dobio dvotrećinsku većinu, zato što je SDA „iznenada“ izašla sa amandmanom da se član 33 predloženog akta dopuni sljedećim tekstom: „Isto lice može najviše dva mandata uzastopno obavljati dužnost općinskog načelnika“. Nakon burne, rasprave, kojom je neformalno otvorena predizborna kampanja na općini (mada to niko nije želio priznati), usvojen je zaključak „da radna grupa za izradu statuta pribavi mišljenje Ustavnog suda BiH“ o navedenom amandmanu SDA.

Pored prijedloga Općinskog statuta, za koji je predlagatelj tvrdio da je potpuno usuglašen sa zakonom o principima lokalne samouprave F BiH (kao, iznenada, „vruće teme“ ove sjednici), vijećnici su razmatrali i usvojili još tri odluke (o namjeni utroška prihoda od koncesionih naknada, o visini naknade predsjedniku i članovima Općinske izborne komisije i o javnoj rasvjeti – narcrt) i dva izvještaja: o realizaciji programa rada Općinskog vijeća i o radu i realizaciji programa rada općinskog načelnika.

04. 02. 2008.

Izašao prvi broj Biltena Aktiva islamskih vjeroučitelja općine Gračanica i Doboj-Istok

Bilten je štampan na četiri strane A5 formata na lijepom glossy papiru i u boji. Sadržajno i tematski je podijeljen na četiri cjeline: uvodni tekst, aktivnosti, informacije i završni dio. U uvodnom dijelu je kraći tekst o historijatu predmeta vjeronauka od turske uprave, preko austrougarske, između svjetskih ratova, pa sve do danas. U rubrici „Aktivnosti“ su sljedeći naslovi; formiran Aktiv vjeroučitelja Gračanica i Doboj Istok, podijeljen promotivni broj „Kevsera“ i „Kevserka“, održan

seminar za vjeroučitelje aktiva Gračanica i Do-boj Istok, Lukavac i Teočak, održana Skupština Aktiva. U zadnjem dijelu ove rubrike je izvješće o distribuciji učeničkih listova Kevsera i Kevserka gdje se ističe da od ukupno 6.716 učenika na području koje pokriva Aktiv, njih 1.110 je odlučilo da kupuje jedan od ova dva školska lista. Kada se uzme procentualno to iznosi 16,5% od ukupnog broja osnovaca. Znači svaki šesti učenik prati ove novine.

29. 2. 2008.

36. sjednica Općinskog vijeća Gračanica: nije prihvaćena Odluka o izvršenju budžeta za 2007. godinu, Gornji Doborovci dobili suglasnost za osnivanje mjesne zajednice

Nezadovoljni odgovorima na niz pitanja koja su postavili u vezi sa realizacijom općinskog budžeta u prošloj godini (koji je ostvaren u iznosu od 13.087.548 KM ili 98,25% u donosu na plan), vijećnici SDA su pri glasanju ostali „uzdržani“, tako da „ostatak“ od 15 podignutih ruku „za“ nije bilo dovoljno da se dokument i usvoji.

Od značajnijih tačaka, usvojena je informacija o stanju bezbjednosti na području Policijske stanice u Gračanici, plan upisa učenika u srednje škole za narednu školsku godinu, uz zaključak da se od resornog ministarstva zatraži da prvi razredi umjesto 30 broje 24 i četiri učenika, zatim Informacija o radu SOS dječjeg sela Gračanica, Informacija o upravnom rješavanju predmeta u službi za upravu općine Gračanica, Informacija o implementaciji Zakona o korištenju, upravljanju i održavanju zajedničkih dijelova i uređaja zgrada.

Zahtjev za formiranje nove mjesne zajednice Gornji Doborovci dobio je jednoglasnu podršku vijećnika.

14. 3. 2008.

Puštena u saobraćaj asfaltirana ulica u Potok Mahali

To je još jedan uspjeh u realizaciji našeg programa rekonstrukcije gradskih ulica i rekonstrukcije putne mreže na općini, rekao je načelnik Općine Nusret Helić, simbolično otvarajući ovu ulicu, koja je, nakon regulacije Japage sada potpuno uređena. Rekonstrukcija i asfaltiranje ulice koštalo je oko 150.000 KM. Čitava Potok Mahala dobila je novi ljepši izgled.

17. 3. 2008.

Otvoren Informativni centar Turističke zajednice Tuzlanskog kantona u Gračanici

Nakon sklopljenog ugovora između općine i Turističke zajednice TK, Ured je otvoren u poslovnom dijelu Osman-kapetanove medrese u centru Gračanice, koji će funkcionalno i lokacijski potpuno odgovoriti svojoj namjeni. Prema ugovoru, zakupninu prostora plaćat će općina, a voditelja ureda zaposlit će Turistička zajednica. Na prigodnoj svečanosti povodom otvaranja ureda, Načelnik općine Gračanica Nusret Helić, obraćajući se okupljenim građanima, između ostalog rekao: „Ovo jeste simboličan čin, jer kancelarija sama po sebi ne znači ništa, ukoliko iz nje ne budu zračile ideje, zamisli i projekti koji će predstavljati preokret u razvoju i unapređenju turističke ponude na području općine Gračanica. Ja se nadam da ćemo u realizaciji tih planova imati punu podršku, prije svega kreativnu i kadrovsku od strane Turističke zajednice kao institucije pod čijim krovom će ovaj ured i poslovati.“

Iako smo se kao općina pročuli po razvoju privatnog biznisa i poduzetništva još u vremenima kada to nije bilo u trendu, iako u mnogim oblastima prednjačimo u odnosu na okruženje, činjenica je da se nismo baš najbolje ni snašli, niti smo se dobro strateški postavili naspram turističkih resursa sa kojima potencijalno raspolažemo – od prirodno-geografskih, pa do kulturno-historijskih i uslužno-ugostiteljskih. To je posljedica naše dosadašnje neorganizovanosti, nedostatka kadrova, ali i nekog podcjenjivačkog odnosa prema ovoj grani u našoj lokalnoj poduzetničkoj sredini. Kako drugačije objasniti činjenicu, da slijedeći, naravno opravdano, svoje poduzetničke interese, neke naše firme i poduzetnici ulažu sredstva i izgrađuju turističke kapacitete na nekim drugim, udaljenim od nas, lokacijama i destinacijama, a ne prepoznaju iste ili slične resurse tu oko nas koji su nam gotovo na dohvata ruke? Spomenut ću gračaničko prirodno bogatstvo – termomineralna izvorišta, netaknutu prirodu Četovulje, koja je pogodna ne samo za izletnički već i za zimski turizam, zatim lokalitet Visa, koji je, na žalost već izložen devastaciji. Ima malo čaršija u Bosni i Hercegovini sa takvim kulturno-historijskim potencijalom kao što ga ima Gračanica – od

sahat-kule kao simbola ovog grada, do kraljevskog grada Sokola koji, usljed naše nebrige, kao da je osuđen na propast.

Iako nije prilika za širu elaboraciju ovih pitanja, zaključit ću konstatacijom da u oblasti turističke privrede imamo dosta neiskorištene resurse i rezerve. Simboličnim otvaranjem ovoga ureda, sama po sebi, nameću nam se i ova pitanja – koja su nam, možda, do sada bila u nekom drugom planu. Učinit ćemo sve da u narednom periodu ne bude tako. Dat ćemo punu podršku svim projektima koji će Gračanicu učiniti ekološki čistim i turistički prepoznatljivim gradom i općinom u Bosni i Hercegovini. Neka ovo ujedno bude i poziv svim našim privrednicima od ideje i akcije da slobodnije izlaze sa projektima i u ovoj oblasti.“

31. 3. 2008.

37. sjednica Općinskog vijeća Gračanica: ništa od Statuta općine

Vijećnici su potrošili čitav dan oko formulaciju pojedinih članova Statuta, ali bez rezultata. Polemike i politička varničenja počela su još na 33. sjednici, kada su vijećnici SDA pokušali da „ubace“ amandman o ograničenju izbora „istoglica“ na funkciju općinskog načelnika najviše u dva mandata, što su vijećnici SDP osporili činjenicom da se ta ograničenja ne spominju niti u ustavu, niti u Zakonu o principima o lokalnoj samoupravi. Uostalom, mandate u ovom slučaju „produžavaju“ ili ograničavaju neposredni izbori načelnika. Kako nije postignuta suglasnost oko ključnih pitanja izbora članova vijeća mjesnih zajednica, a potom i izbora i imenovanja članova upravnih odbora javnih ustanova i preduzeća, općinski Statut općine ni ovog puta nije dobio dvotrećinsku većinu, te je ostao i dalje „na čekanju“

Osim „statutarne tačke“ oko koje se najviše „radilo“, na ovoj sjednici usvojene su sljedeće odluke: o utvrđivanju prosječne konačne cijene kvadratnog metra korisne stambene površine na području općine Gračanica, o utvrđivanju visine naknade za pogodnost gradskog građevinskog zemljišta (rente), o promjeni oblika i statusa Javne ustanove Veterinarska stanica Gračanica, o promjeni statusa nepokretnosti u opštoj upotrebi u naselju Varoš.

Povodom ponude za kupovinu Sportske sale

koju je vlasnik dostavio općini, Vijeće je imenovalo komisiju koja će razmotriti ponudu i formulisati odgovor „ponuđaču“. Dalo je u javnu raspravu Regulatorni plan „Radna zona I“ i konačno usvojilo izvještaje o radu i finansijskom poslovanju za 2007. godinu sljedećih javnih ustanova: Veterinarska stanica, Bosanski kulturni centar i Dječje obdanište.

5. 4. 2008.

Asfaltirana ulica Patriotske lige i sportski tereni ispred Druge osnovne škole

Ulica vodi do sportske dvorane Luke i sportskog poligona pred Drugom osnovnom školom, gdje će se održati sportski susreti učenika osnovnih škola iz bratskih gradova Fleury Les Aubrais (Francuska), Formie (Italija), Haningea (Švedska) i domaćina Gračanice, pod nazivom "Gračanica u susret Evropi". Za asfaltiranje spomenute ulice općina je izdvojila 60 hiljada KM, a za sređivanje sportskog poligona 43 KM. Ovi objekti na simboličan način predati su na upotrebu na skromnoj svečanosti koja je priređena u sklopu obilježavanja 7. aprila Dana oslobođenja Gračanice u Drugom svjetskom ratu.

6. 4. 2008.

Gornja Orahovica: otkriveno obnovljeno spomen-obilježje poginulim borcima NOR-a, obilježen početak radova na izgradnji vodovoda

Svečanost je upriličena povodom 7. aprila Dana oslobođenja općine Gračanica u Drugom svjetskom ratu. Riječ je o obnovljenom spomeniku poginulim borcima 14. srpske udarne brigade koji su poginuli u operacijama za oslobođenje Gračanice od njemačkog okupatora. Spomenik su otkrili: Sulejman Devedžić, predsjednik općin-



skog odbora UBNOR-a, općinski načelnik Nusret Helić i općinski vijećnik Vehid Osmanović.

Početak izgradnje vodovoda u tom selu obilježen je na lokaciji budućeg bazena u koji će se voda „upumpavati“ iz bušotine, kapaciteta 1,5 litra vode u sekundi.

6. 4. 2008.

Babići: svečanost povodom puštanja u saobraćaj nekoliko asfaltiranih dionica seoskih puteva i igrališta

I ova svečanost upriličena u okviru programa obilježavanja 7. aprila, dana oslobođenja Gračanice u Drugom svjetsko ratu. Na skromnoj svečanosti predate su na upotrebu sljedeće putne dionice: od Zvijezde prema Gračanici u dužini od 700 metara. Vrijednost radova 192.000 KM (općina 132.000 KM, mještani 60.000 KM), dio puta u Karićima od Merajice do Halilovića u dužini od 400 metara. Vrijednost radove 37.000 KM (općina 10.000, mještani 27.000 KM). Zvanično je otvoren i sportski poligon u selu, u čiju je rekonstrukciju i uređenje utrošeno 39.000 KM (općina 30.000, donatori 9.000 KM).

13. 4. 2008.

Hoće li definitivno početi sređivanje memorijalno-rekreativnog kompleksa Vis – Sijedi krš?

Potaknuti inicijativom brojnih građana, te nekih članova Redakcije „Gračaničkog glasnika“, predsjednici mjesnih zajednica Babići i Malešići, Rahim Imamović i Ibrahim Hasić, pozvali su na zajednički obilazak platoa Vis–Sijedi krš općinskog načelnika i njegove saradnike, predstavnike Turističke zajednice TK i nekoliko privrednika iz tog dijela općine s ciljem da iniciraju početak planskog uređivanja i korištenja tog prirodnog resursa. Odziv je bio izuzetno dobar, pa je tokom obilaska terena organizovan i radni sastanak na kojem je načelnik općine Nusret Helić obećao da će formirati poseban stručni tim koji će voditi dalje poslove oko uređenja tog izuzetno atraktivnog prirodnog i memorijalnog kompleksa.

17. 4. 2007.

Osnivačka konferencija Tehnološkog centra plastičara i alatničara u Gračanici

Nakon uspješnog starta Klastera (Udruženja) plastičara i alatničara BiH, u Gračanici su potpisani prvi ugovori o utemeljenju tehnološkog cen-



tra koji će poslovati kao dioničko društvo i biti u funkciji privrednog razvoja općine, a posebno visokih tehnologija u oblasti prerade plastike i alata za industriju. Pored zainteresovanih privrednika općine Gračanica, konferenciji su prisustvovali predstavnici univerziteta i mašinskih fakulteta iz Tuzle i Zenice, te predstavnici općine, koja snažno podržava ovu aktivnost. Tako se upravo izrazio načelnik općine Nusret Helić, pozdravljajući ovaj skup.

Uz međunarodnu podršku, to će biti BiH centar za napredne tehnologije i inženjerstvo, koji će pružati sljedeće usluge: dizajniranje alata i alatljika, kao i proizvodnih rješenja, konsultiranje u vezi sa proizvodnim procesom i dizajnom, programiranje CNC mašina, 3 D modeliranje, simuliranje i vizualizacija, uključujući 3 D digitalizaciju, obuka i izgradnja vještina kroz kurseve i module, ispitivanje kvaliteta proizvoda, predlaganje tehnoloških rješenja, upućivanje na efektivne i efikasne puteve pridobijanja evropskih certifikata za proizvode itd.

Glavna poruka konferencije, koju je na svoj način izrekao i gosp. Suad Helić, jedan od vodećih gračaničkih privrednika u grani prerade plastike, glasi: „prošlo je vrijeme kapitala, dolazi vrijeme znanja i pameti.“

25. 4. 2008.

Međunarodno sportsko takmičenje učenika osnovnih škola bratskih gradova Flori Lezobre (Francuska), Formia (Italija), Haninge (Švedska) i Gračanica (BiH) – «Gračanica u susret Evropi 2008.»

Od 21. do 26. aprila ove godine Općina Gračanica bila je domaćin manifestacije koja se već petu godinu zaredom održava u jednom od ovih

gradova i polako prerasta u tradiciju. Na susrete je stiglo 112 učenika iz tri spomenuta grada, koji su se takmičili u atletici, nogometu i odbojci. Delegaciju i ekipu Flori Lezobre predvodio je vječiti prijatelj Gračanice, novoizabrani stari gradonačelnik Florija Pjer Buše, ekipu Formia predvodio je predstavnik načelništva tog grada Marsello Luciciola, a delegaciju i ekipu Haninge komun predsjednica općine Marietta de Pourbaix-Lundin. U ekipi domaćina nastupali su učenici Druge osnovne i Osnovne škole „Hasan Kikić“ iz Gračanice. Manifestacija je propraćena kvalitetnim kulturno-umjetničkim i zabavnim programima, koji se tokom susreta organizovali kako za mnogobrojne goste (oko 150 samo iz inostranstva), tako i za građane Gračanice. Otvaranju manifestacije, 22. 4. 2008., pored brojnih građana i omladine Gračanice, prisustvovala je i ambasadorica Francuske u BiH Maryse Berniau, predstavnik Evropske unije u BiH Michael Docherty, predstavnici Evropskog pokreta u BiH Dino Čolić i Predrag Praštalo, predstavnici Vlade TK, susjednih općina itd.

Poželivši dobrodošlicu „u evropski grad – Gračanicu“, na otvaranju manifestacije, u prepunoj sportskoj Sali „Luke“, načelnik općine Gračanica Nusret Helić je, između ostalog rekao: „Trudit ćemo se da u naredna tri dana pokažemo da to uistinu i jesmo i da zasluženo nosimo takve atribute. Zasluga je to svih građana ovog grada, koji je uvijek imao otvorene kapije za sve dobre ljude, za dobre ideje, koji je oduvijek gradio mostove saradnje i prijateljstva, pa i u danima rata, kad je svima bilo teško, kad je bilo stani-pani.

U naredna tri dana na ovim našim sportskim terenima, na našim ulicama, pod zastavama Evropske unije, Francuske, Italije, Švedske i Bosne i Hercegovine vidjet ćemo mladost Evrope u najljepšem izdanju. Naši prijatelji dolaze nam raširenih ruku, da nas ohrabre, da nam pomognu na našem putu ka Evropi. Gračanica tim putem ide nešto brže u odnosu na svoje okruženje, Bosna i Hercegovina mnogo sporije nego što bismo to željeli. Prepreke nisu u gradovima i općinama kao



Velika dvorana BKC: Detalj sa zatvaranja manifestacije "Gračanica u susret Evropi"

što je Gračanica. Zato gradimo mostove ka Evropi i rušimo prepreke ka Evropi.“

Pored sportskih takmičenja, manifestacija je bila propraćena kvalitetnim kulturno-umjetničkim i zabavnim programima, kako za mnogobrojne goste (oko 150 samo iz inostranstva), tako i za građane Gračanice.

Izvršni odbor Organizacionog odbora manifestacije koji je predvodio prof. Amir Zejnilagić sa svojom ekipom, izvanredno je obavio sve programirane zadatke manifestacije. To je opća konstatacija, koja je uz sve pohvale domaćinu izrečena na završnoj priredbi, 25. 4. 2008. godine.

26. 4. 2008.

Aktiv vjeroučitelja Gračanica i Doboj Istok: prvo općinsko takmičenje iz islamske vjeronauke

Na takmičenju je učestvovao 71 učenik iz 12 škola općina Gračanica i Doboj Istok. Prvo mjesto (sa osvojenih 96, od mogućih 100 bodova) je osvojila učenica OŠ "Hasan Kikić", Mustafić Vanesa. Drugo mjesto su zbog jednakog broja bodova (94/100) osvojile učenice Čekrić Munira iz OŠ "Orahovica Donja" i Dizdarević Naida iz OŠ "Soko". Treće mjesto (93/100), također, dijele dvije učenice iz OŠ "Hasan Kikić" – Kopačić Amela i Šabić Adnana. U ekipnoj konkurenciji prvo mjesto je osvojila OŠ "Soko" sa prosječno osvojenih 88,75 bodova, drugo mjesto je osvojila "Orahovica Donja" sa prosječno osvojenih 80 bodova, dok je treće mjesto zauzela OŠ "Miričina" sa prosječno osvojenih 77 bodova. Najuspješ-

niji su bili predstavnici OŠ "Hasan Kikić", koji su od prvih deset mjesta, zauzeli čak pet. Iduće školske godine, kako je najavljeno, Savjet vjeroučitelja Muftijstva tuzlanskog će u saradnji sa Pedagoškim zavodom, nakon održanih općinskih, organizovati i kantonalno takmičenje iz Islamske vjeronauke.

27. 4. 2008.

„Širbegović“ grupa: dobila priznanje na Zagrebačkom velesajmu TEGRA

...za sveukupna marketinški nastup i najviši nivo oblikovanja. „Dobiveno priznanje samo je potvrda našeg kvalitetnog i profesionalnog djelovanja na području cijele regije. Predstavlja nam dodatnu motivaciju za još više rada, truda i boljih poslovnih rezultata u budućnosti,“ izjavili su za medije predstavnici ove gračaničke renomirane proizvodne kompanije.

29. 4. 2008.

Trideset osma sjednica Općinskog vijeća: hoće li se Gračanica za tri godine gušiti u smeću?

Zbrinjavanje čvrstog otpada jedan je od najvećih ekoloških problema u većini lokalnih zajednica u Bosni i Hercegovini, ali i u svijetu. Iako lokalne vlasti poduzimaju mjere da ublaže taj problem prema svojim uslovima i mogućnostima, on se, usljed ubrzanog razvoja svakim danom sve više komplikuje. Ova u cjelini odnosi se i na područje općine Gračanica.

Osim lokalnih zajednica i drugi nivoi vlasti u Kantonu, FBiH, pa i državi donijeli su određene zakonske okvire i usvojili strategije ekološkog zbrinjavanja čvrstog otpada. (regionalne sanitarne deponije itd.)

Na području općine Gračanica ovaj problem je iz godine u godinu sve izraženiji. Postojeća gradska deponija (uz sve nedostatke, lokacijske i tehničko-ekološke), ograničenog je kapaciteta, a rješenje adekvatne zamjene ili otvaranja deponije na nekom drugom mjestu se i ne nazire. U proteklom periodu bilo više bezuspješnih pokušaja da se ozbiljnije pristupati rješavanju tog problema. Jedan od posljednjih bio je pokušaj izgradnje spalionice otpada velikih kapaciteta, ali se od njega odustalo, pošto je usvojen strateški pravac rješavanja tog pitanja na nivou zemlje izgradnjom regionalnih sanitarnih deponija za koje su sredstva obezbijedena iz fondova Svjetske banke. Po tim

projektima Gračanica je bila „naslonjena“ na regionalnu sanitarnu deponiju u Lukavcu (Huskići). Nakon višegodišnjeg „natezanja“ oko te lokacije (zbog protivljenja lokalnog stanovništva i lokalne politike) i dosta izgubljenog vremena, krajem prošle godine definitivno se moralo odustati od te lokacije i tražiti neko novo rješenje. Danas niko ne zna kakva je sudbina i koja će biti nova lokacija buduće regionalne sanitarne deponije i hoće li se uopće više raditi na tom projektu. Kako je na nivou zemlje usvojena strategija za zbrinjavanje otpada putem regionalnih sanitarnih deponija, u međuvremenu su se u okviru svjetske banke planirane nove kreditne linije iz kojih će se pod najpovoljnijim uslovima finansirati projekti manjih sanitarnih deponija (za jednu ili više susjednih općina).

Javno preduzeće za komunalne poslove «Komus» d.o.o. Gračanica dovoz i deponovanje otpada i smeća, od 1979. godine, vrši na Gradsku deponiju «Grabovac» u Gračanici, koja se nalazi na regionalnom putu Tuzla–Doboj i zauzima površinu od 16.675 m². Iako je u funkciji skor 30 godina, deponija ni do danas nema okolinsku dozvolu, niti je do sada pokretana bilo kakva aktivnost za izradu projekta sanacije za dobijanje okolinske dozvole za taj objekat. Popunjenost deponije «Grabovac» otpadnim materijalom je negdje oko 80 % njenog kapaciteta. Prema trenutnom intenzitetu popunjavanja deponije ona može biti u funkciji maksimalno još tri godine. Sadašnje stanje u pogledu zbrinjavanja čvrstog otpada na području općine Gračanica, uključujući i alarmantna ograničenja kapaciteta i nedostatke postojeće gradske deponije, zahtijeva ozbiljan pristup rješavanju ovog problema. Stoga je Općinsko vijeće, gotovo „minut do dvanaest“ usvojilo sljedeće zaključke: Zadužuje se Općinski načelnik da (1) odmah angažuje stručni tim koji će u roku od 60 dana uraditi Elaborat o mogućnostima zbrinjavanja komunalnog čvrstog otpada na području općine Gračanica, kao podlogu za izradu studije koja će ponuditi adekvatna rješenja tog problema. (2) Izradu Studije povjeriti kroz zakonsku proceduru ovlaštenoj stručnoj firmi ili instituciji koja je u stanju ponuditi kvalitetna rješenja zbrinjavanja komunalnog čvrstog otpada za čitavo područje općine u skladu sa važećim zakonima i Federal-

nom strategijom upravljanja otpadom, što podrazumijeva da moraju biti kompatibilna sa planovima izgradnje regionalne deponije za TK.

Pored ovog važnog ekološkog i strateškog pitanja za dalji razvoj Gračanice, Vijeće je usvojilo informaciju o higijensko-epidemiološkoj situaciji na području općine Gračanica u prošloj godini (koja nije zadovoljavajuća) i nekoliko izvještaja: o radu Općinskog suda u prošloj godini, o zdravstvenom stanju stanovništva općine Gračanica, te radu i finansijskom poslovanju javnih zdravstvenih ustanova u prošloj godini – Doma zdravlja, Gradske apoteke i Opće bolnice.

29. 4. 2008.

Još jedna politička stranka u Gračanici

Ovoga puta to je „Naša stranka“ („a ne njihova“), koju je nedavno osnovala grupa intelektualaca, kulturnih radnika, pretežno „filmađžija“, na

čelu sa popularnim Danisom Tanovićem u Sarajevu. Organizatori osnivačkog skupa uspjeli su okupiti oko 150 simpatizera i znatiželjnika, koji su se, nakon nekoliko optimističkih obraćanja (uglavnom u smislu „ni lijevo, ni desno“) i izbora sedmočlanog inicijativnog odbora (predsjednik je Mirsad Čamdžić) razišli s nadom da će „Naša stranka“ imati bar jednog svog vijećnika u Općinskom vijeću nakon predstojećih lokalnih izbora – jer „ko će ako neće Naša...“

30. 4. 2008.

Škahovica: pušten u saobraćaj put u Iljazovićima

Radi se o saobraćajnici koja spaja Škahovicu i Babiće, te povezuje nekoliko mahala unutar sela. Asfaltirano je oko 1500 metara puta, uloženo oko 150.000 KM.

